

COMISION DI BUENA BOLUNTAD TA PROPONE PA SIGUI RUTA DI CARNAVAL TE LICORES ARUBA



ORANJESTAD(AAN) -- Durante un conferencia di prensa na Holiday Inn, Comision Di Buena Boluntad, a entrega e presidente di SAC, un rapport cu recomendacionnan pa drecha celebracion di nos Carnaval na Aruba.

E comision a cuminsa traha e Diabierna despues di Carnaval y a sigui reuni durante tur e lunanan cu a pasa. E comision ta consisti di Milo Croes di SAC, Shon Pe Krozendijk di Polis, John Jeandor di ASOMA, John Flemming di grupo, Alvin Koolman di grupo, Marcia Stamper di grupo, Ruben Garcia y Yubi Naar di prensa, Reimundo Barros sponsor y Shereen de Cuba secretaria.

Un di e recomendacionnan cu tur aña ta e topico di discusion ta e ruta.

Comision Di Buena Boluntad teniendo cuenta cu e aspecto climatologico, pues e direccion constante di e bi-ento (Noord Oost passaat), nan ta haya cu un caminda recto lo ta mas ventahoso pa e parada grandi.

Mirando cu atraves di añanan Vondellaan y Lloyd G. Smith Boulevard a bira dos caminda cu a cay na agrado di e pueblo carnavalesco y cu filmacion local y internacional ta tuma lugar, e comision no tin inconveniencia pa e parada sigui pasa den e dos cayanan aki.

Sinembargo e comision a constata cu despues cu e parada drehta den Weststraat y sigui su rumbo den e otro cayanan, e ta "muri".

Ta riparable cu e tocadornan y participantenan ta perde animo y nan NO ta jump entusiasmo mas.

Nan animo ta baha completamente. E ta perde su ritmo. Pesey mes e comision ta di opinion, mirando e ariba menciona, cu e parada no mester drehta Weststraat pero e mester sigui te na Licores Aruba of te na Club Visage caminda tin suficiente caminda pa e worde disolve ampliamente loke ta benefico pa e trafico.

Loke por a constata durante e conferencia tabata e terquedad di e presidente di SAC. Notable ta cu siendo

miembro di e comision, solamente dos biaha el a asisti na reunion, siendo cu tabatin un cantidad di reunion.

Den e reunion por a nota cu Milo Croes ta keda para ariba cu ta SAC ta dicidi y cu por ta lo bay tene e conshonan den consideracion.

Actitudnan asina ta pone uno rabia ya cu mester aplaudi cu tin un comision cu ta trahando na beneficio di nos carnaval.

Si SAC sigui asina, carnaval di Aruba ta sigui sac. Hecho ta cu e ambiente di trailer, paisnan bisiña a copia esaki y awor ta un ambiente formal por mira na e paisnan aki ora di carnaval. Pakico nos tin cu duna ehempel, pero nos mes no ta percura pa bay dilanti. Acaso hasta nos carnaval, SACA kier boycotea??

Ta di spera cu e recomendacion di Comision Di Buena Boluntad worde aproba ya cu e ruta aki ariba su mes ta hopi bon y ta brinda hopi mas espacio pa staciona trailer, cual ta contribui na saco di Gobierno.